



პოლიტიკა

საქართველოს პედაგოგთა და მეცნიერთა თავისუფალი პროფკავშირის პრეზიდენტი განცხადებას ავრცელებს

18:26 22-09-2012



საქართველოს პედაგოგთა და მეცნიერთა თავისუფალი პროფკავშირის პრეზიდენტი, მაია კობახიძე ბოლოდროინდელ მოვლენებს ეხმაურება და განცხადებას ავრცელებს. აღნიშნულ განცხადებას "ინტერპრესნიუსი" უცვლელად გთავაზობთ. "სამწუხაროდ სისტემური შეცდომები დაშვებულია არა მარტო სასჯელაღსრულების დეპარტამენტში მიმდინარე რეფორმების დროს, არამედ განათლების რეფორმაშიც. ჭეშმარიტებაა, რომ ყველაზე გულწრფელი და სწორი რეაქცია ქვეყანაში მიმდინარე პროცესებზე აქვთ სტუდენტებსა და ახალგაზრდებს. პირველ რიგში, მინდა, მაძღობა გადავუხადო გუშინდელ აქციაში მონაწილე ყველა სტუდენტს, რომლებმაც ემოციურად და სამართლიანად გამოხატეს თავიანთი დამოკიდებულება იმ შემზარავი ფაქტების მიმართ, რაც ტელეეკრანებიდან ყველამ

ვიხილეთ. ახალგაზრდებმა მიზანს მიაღწიეს. მათი ასეთი მოქმედება მაგალითი უნდა გახდეს ყველასთვის. დროა, პედაგოგებმა ღრმად გააანალიზონ შექმნილი ვითარება, გადალახონ შიშის ფაქტორი და დაანახონ საზოგადოებას თავიანთი მოქალაქეობრივი პოზიცია.

პედაგოგის შემდგომი ავტორიტეტის განმსაზღვრელი იქნება 1 ოქტომბრის საპარლამენტო არჩევნები და თუ როგორ იმოქმედებენ საარჩევნო კომისიის წევრი პედაგოგები არჩევნების დროს. როგორ დაიცავენ კანონს - თითოეული მოქალაქის და ქართველი ერის არჩევანს, არის უმთავრესი ტესტი ამ ინსტიტუტის შემდგომი ღირსეული ადგილის დამკვიდრებისათვის საზოგადოებაში.

სამწუხაროდ, სისტემური შეცდომები დაშვებულია არა მარტო სასჯელაღსრულების დეპარტამენტში მიმდინარე რეფორმების დროს, არამედ – განათლების რეფორმაშიც. პედაგოგებს წაართვეს გამოხატვისა და გაერთიანების თავისუფლება. საკლასო ოთახების ნაცვლად შეუქმნეს საკნები, კომფორტული გარემოს ნაცვლად - სტრესული გარემო. აკონტროლებენ მანდატურები, რომელთა აქტების საფუძველზე შელახეს უამრავი პედაგოგის ავტორიტეტი. დღეს ყველა პრობლემამ დაკარგა აქტუალობა იმ შემზარავი კადრების გამოაშკარავებით, რაც იხილა სრულიად საქართველომ. დროა, ყველამ ერთად დავიწყოთ მოქმედება არსებული მდგომარეობის შესაცვლელად.

მიგვაჩნია, რომ ახალარჩეულმა პარლამენტმა, პირველ რიგში, უნდა გააუქმოს კაბალური შრომის კოდექსი და მიიღოს ახალი ცივილიზებული, თანამედროვე, ევროპული სტანდარტების შესაბამისი კანონი, რაც საწინდარი იქნება დასაქმებულთა შრომითი, სოციალური და სამართლებრივი პირობების გაუმჯობესებისათვის", – აღნიშნულია მაია კობახიძის განცხადებაში.

მასალის გამოყენების პირობები